

KOMUNITI KITA

Cucu A.B Hubback rasmi pameran seni bina warisan



PETER RONALD BARBOR (dua dari kanan) bersama Ketua Pengarah Jabatan Muzium Malaysia, Datuk Ibrahim Ismail (tiga dari kanan) melihat pameran Temasya Seni Bina Warisan A.B Hubback di Muzium Tekstil Negara, Kuala Lumpur baru-baru ini.

LAWATAN BERSEJARAH. Selepas lebih 100 tahun pembinaan bangunan bersejarah seperti Sultan Abdul Samad dan Masjid Jamek, baru-baru ini cucu kepada pelukis pelan bangunan bersejarah itu, Dr. Peter Ronald Barbor-Hubback membuat lawatan buat pertama kali ke Kuala Lumpur bagi melihat sendiri keindahan bangunan itu.

Dua bangunan yang menggunakan sentuhan seni bina Moorish dan Moghul mendapatkan sentuhan rekaan dan kreativiti lukisan pelan mendiang datuk beliau, Brigadier Jeneral Arthur Benison Hubback (A.B Hubback) sekitar tahun 1890-an.

Menurut Peter Ronald Barbor, kedatangan beliau ke Malaysia sebenarnya diundang oleh Pertubuhan Arkitek Malaysia untuk merasmikan pameran Temasya Seni Bina Warisan A.B Hubback di Tanah Melayu di Muzium Tekstil Negara, Jalan Sultan Hishamuddin baru-baru ini.

"Saya terharu dapat datang ke Kuala Lumpur dari United Kingdom untuk melihat sendiri bangunan-bangunan bersejarah yang mendapat sentuhan seni bina datuk saya," katanya.

Pameran secara percuma itu berlangsung sehingga 30 Jun ini.